

欽定平定教匪紀略

欽定平定教匪紀畧卷三十一

正月十一日酉胡克家奏言查安省節次派調

官兵共二千二百名團練隨營鄉勇一千名又

宿州阜陽太和三州縣召募協防壯勇共一千

二百名前聞滑城克復臣已將鄉勇概行遣散

歸農惟鄰境甫經寧輯居民尙資捍衛今酌定

暫留官兵八百名在宿亳太和三州縣分駐彈

歷至二月間再行全撤其餘各營官兵擬於正月  
月初二日爲始酌定日期分起回營其留防官  
兵應得分例仍照前支給應於各兵勇口糧及  
防禦一切費用統歸捐廉項下核實報銷如有  
例不准銷之項另籌分攤歸款再投効同知陳

其松經

臣

奏派統領鄉勇分駐河南永城縣境緝獲零匪稍

有微勞該員係雙月同知可否准令該員捐足  
不論雙單月併分發銀兩就近繳納安徽藩庫  
留於安省遇缺補用之處出自

聖主天恩奏入

上命軍機大臣傳諭胡克家曰胡克家奏安省邊界  
節次派調官兵二千二百名團練隨營鄉勇一千  
名又宿州阜陽太和三州縣召募協防壯勇一千

二百名現在鄰境甫經寧輯居民尙資捍衛請酌  
留官兵八百名在宿亳太和三州縣分駐彈壓二  
月內再行全撤其官兵分例仍照前支給應與各  
兵勇口糧及籌備防禦一切費用統歸捐廉項下  
核實報銷等語國家設兵衛民其調防官兵准其  
照例開銷至團練隨營鄉勇與召募協防壯勇從  
來無此名目前曾明降諭旨不許召募鄉勇預爲

冒銷地步今該撫自行雇用乃請將口糧與兵丁一例開銷向無此例所有發過鄉勇口糧著該撫自行籌畫辦理若將來報銷時仍率混鄉勇在內不待發交部議朕卽先行批駁斷不准行也至所奏投効同知陳其松緝獲零匪稍有微勞請留安省補用等語著照所請雙月同知陳其松准其將捐足不論雙單月併分發銀兩就近繳納藩庫留

於安徽遇缺補用以示鼓勵

正月十二日

甲戌

董誥等奏請將逆犯牛亮臣馮

克善徐安幘劉第五卽劉宗林梁健忠趙步雲

陳文思周自得周添喜李盛得閆正興蔣立生

卽蔣生兒耿二張貴十四犯均凌遲處死梟示

內牛亮臣馮克善徐安幘三犯並痛加鑿割又

張老大卽張黑兒斬決梟示馮哲王三卽王明

二犯均斬決其知情容留聽從入教之朱樹德  
卽朱樹鐸等並應行緣坐之蔣陳氏等十一名  
口分別發遣爲奴請

旨

是日

上廷訊牛亮臣馮克善二犯盡法懲治降

旨牛亮臣馮克善徐安幘劉第五卽劉宗林梁健忠



趙步雲陳文思周自得周添喜閻正興蔣立生卽  
蔣生兒耿二張貴俱著卽凌遲處死梟首示衆張  
老大卽張黑兒著卽處斬免其梟示馮哲王三卽  
王明俱著處斬其李盛得一犯著暫留監禁待質  
餘依議

同日

上諭內閣曰此次吉林黑龍江官兵調往軍營伊等

初到時卽盡力將司寨地方賊衆悉數剿除且將  
賊首李文成殲斃嗣至滑縣地方攻城接仗殲斃  
賊匪甚多奮勇出力甚屬可嘉此皆由該將軍副  
都統等平素訓練有方除色爾滾德寧阿因在軍  
營出力業經施恩外所有現任將軍喜明富俊副  
都統松寧穆騰額蘇青阿明德俱著施恩交部議  
敘賽沖阿雖調成都將軍離吉林未久亦著交部

金匱要略卷三十一  
王  
一體議敘

同日百齡奏言臣欽奉

諭旨查明江省隨營出力人員據實保奏查河庫道

徐炘經臣帶赴徐城隨同籌商一切深悉機宜

可否請

旨賞加按察使銜徐州道毓岱巡查嚴密堵禦認真  
徐州府知府音德和團練義勇安撫居民實心

實力該二員可否請

旨賞戴花翎此外應行鼓勵各員謹分晰開單恭呈  
御覽再查原發四川緣事革職直隸州州判董榮緯  
經勒保帶至江南幫辦文案文理尙通可否

准其捐納監生應試奏入

上諭內閣曰百齡奏查明隨營出力各員據實保奏  
一摺上年百齡督師徐州防守邊境並分兵保衛

鄰封所有在事出力文武各員亦應量予獎勵河  
庫道徐忻著施恩賞加按察使銜徐州道毓岱徐  
州府知府音德和俱著賞戴花翎安徽候補知府  
張丕昌著准其儘先補用候補知府錢有序准其  
留於兩江遇有相當缺出奏請補用候選知府方  
傳穰准其歸部儘先選用署泰州州同李嘉祥准  
其改撥地方以應陞之缺陞用桃源縣縣丞劉金

殿准其以應陞之缺陞用候補知縣劉鈐周履福  
林沛候補縣丞程鍾慶沈渭王規張景沂候補未  
入流吳敬然俱准其儘先補用在籍廕卹縣丞徐  
錫壽候選縣丞楊德垣候掣主簿屠慕曾准其發  
往安徽遇缺補用候補縣丞蔡維新候選吏目黃  
延禔准其留於江蘇遇缺補用豐縣知縣張執琮  
沛縣知縣鄭其忠碭山縣知縣王臺俱著交部議

敘松江城守營遊擊馬進奇兵營遊擊楊昇漕標  
右營遊擊潘遇龍河標中營都司徐彬督標城守  
營都司張應錫常州營守備朱國泰俱著交部議  
敘在籍藍翎侍衛袁夢熊准其留於江蘇以守備  
儘先補用廣東世襲雲騎尉劉上全准其以守備  
儘先補用其奏請革職直隸州州判董榮緯揭監  
應試之處不准行著以典史補用

是日文孚康紹鏞奏審訊山海關獲犯馬泳福  
柴玉林施廣三案委無謀逆情事前由該處官  
兵圖賞邀功妄拏誘供加以刑逼是以誣服除  
卽分別省釋外請將協領常亮佐領武爾棍泰  
防禦海德交部嚴加議處甲兵德克精阿等懲  
處如律其副都統額勒金布俟司敬武葛洪才  
兩案定讞時再行叅



奏奏入得

旨額勒金布於山海關盤獲各犯任聽屬員等刑逼誘供草率具奏著交部議處來京聽候部議所有山海關副都統員缺著文孚補授

正月十三日<sub>亥</sub>那彥成奏言竊<sub>臣</sub>將各路官兵分起凱撤後本擬隨帶直隸督標兵及宣化鎮標兵各一千名吉林黑龍江兵六百名沿途巡

查惟查開州東明曹州德州景州一帶現俱有  
兵留駐足壯聲威是以酌擬於抵開州後卽將  
前項直隸官兵分起撤回歸伍止帶吉林黑龍  
江兵六百名一路巡查撫卹良民搜捕餘匪現  
於十一日移營前進其吉林索倫官兵飭令由  
豫省支給一月鹽菜口糧裹帶行走所過州縣  
仍舊劄營空曠地方不入城內居住並嚴加約

東刻下賊匪盡絕惟饑民實關緊要河北更係  
連年積歉之區災黎尤爲不少臣已督令藩司  
台斐音衛輝府知府郎錦騏及滑濬兩縣分設  
粥廠實力妥辦並移咨方受疇督率辦理

那彥成又奏言查現在軍營出有武職各缺臣

秉公遴選將隨營出力之員分別擬補謹開單

進

呈伏候

施恩鼓勵再臣接准楊遇春咨稱新調甘肅花馬池營叅將陳弼前於攻克滑縣時登城墜跌致傷左腿已成殘廢應請

旨將該員休致

同日方受疇奏言臣欽奉

諭旨查拏商邱縣卦主邵姓一犯遵卽密委試用知

縣王渭馳赴歸德假抽查戶口爲名查明該犯所住村莊會同該處地方官將部大一犯拏獲

臣親提研審據供姓部名坦照伊祖部生文於

乾隆三十六年間習教破案擬絞正法伊父行

四已於十七年八月病故上年八月楊遇山遣

人致書約於九月初赴曹縣會齊起事伊畏懼

未去書已燒燬等語遵卽派員將該犯解赴直

隸交章照歸案審辦再豫省開正以來地方日就寧靜北岸除考城防兵暫行酌留外其餘封邱等處官兵已全行撤回歸伍均奏入

上命軍機大臣傳諭那彥成曰滑縣附近賊匪俱已搜捕淨盡那彥成現在移營開州因開州曹州德州景州一路俱有留駐之兵擬將直隸兵二千名分撤歸伍祇帶吉林黑龍江兵六百名一路巡查

回京自應如此辦理此時直東境內甫經寧輯人心尙未大定餘匪亦未能全淨那彥成帶兵行走毋庸按站饋程每日酌量或二三十里或四五十里沿途緩緩移營留心察看如各處尙有藏匿逆匪卽駐營訪拏曉諭鄉民趁此兵威自行縛獻遇途中有訊辦事件駐紮一二日辦竣再行前進均無不可那彥成沿途所過州縣多係災區已飭各

該地方官加意撫卹如或辦理不能妥協該督於過境時查出卽隨時督飭令其認真經理無致災民失所倘竟有玩視民瘼一任窮黎轉徙罔或拯卹者卽當嚴行叅奏

上又命軍機大臣傳諭章煦方受疇同興曰直隸豫東邊界自滑城克復之後其首逆及著名賊目或殲或擒漏網者少但賊夥本多其零星逃逸者自



所不免聞大兵在境則伏匿不出大兵全撤之後  
或又潛出滋事此時善後事宜最關緊要現據吳  
璫奏稱伊於途次留心訪問山東曹州府屬及金  
鄉魚臺一帶向來匪黨本多至今强悍之風未息  
聞良民或因舉報餘孽或因團練防堵以致結恨  
成讐匪徒尙思報復良善均有戒心其被賊蹂躪  
之區田畝未能播種饑民羣聚良莠難分豫省睢

州工次並偶有焚燒料垛之事寧陵考城濬滑封邱等處難民災民不少間有土賊搶掠開封及河北三府荒旱地方太廣二麥未種人心尙難大定恐各州縣營汛以大局已平稍存大意請飭諭該督撫實力安撫加意防範等語各處零匪旣多未淨而土棍乘機劫掠擾害良善必須認真搜捕卽於編查保甲之時令鄉民自行首報方可全就剔

除但非懾以兵威則良民畏懼兇徒不敢舉首或  
橫遭刦掠亦相與隱忍且地方兵役有限奉官查  
拏恐拒捕滋衅亦畏縮不前現在該三省本各有  
未撤防兵著該督撫密飭帶兵將領仍嚴整武備  
鎮靜彈壓附近州縣藉此聲威匪徒等先心懷畏  
懼其有私藏器械夜聚曉散妄冀勾結報復者均  
令紳士耆民指名報官兵役等奉官查緝匪徒等

必不敢稍有抗拒倘有逞兇拒捕情事州縣官就  
近移會駐兵大員不難立時帶兵擒捕凡在官民  
俱各恃以無恐其飭緝各要犯如祝現劉呈祥劉  
第五董伯旺支進才劉成章等或卽在此數縣匪  
黨家窩藏若能舉首查獲更當加以優賞至各處  
無賴匪徒聞此次係白蓮教謀叛滋事往往有詐  
稱白蓮教恐嚇鄉愚乘間劫奪財物者該匪徒既

以白蓮教自居拏獲審明卽照白蓮教逆犯治罪  
毋稍姑息此外僅習教而改悔自新者地方官隨  
時化導稽查勿令妄拏滋衅統俟麥熟後人心大  
定再行奏聞將留駐之兵全行裁撤可也上年荒  
旱之區豫省爲最甚大河南北饑民嗷嗷其老弱  
轉徙情形聞之心惻此時撫卹二字尤爲最要方  
受疇當體朕保赤之懷力爲拯救此等饑民本無

爲匪之心見食搶掠不過苟全生命倘能安撫得  
法皆可保爲善良本日那彥成奏河北被賊被災  
情形據稱業已稟咨方受疇督令地方官於賑卹  
之外多設粥廠該撫務當督率地方官加意經理  
以期多所全活至賊蹤狡詐無常饑民旣多亦難  
免有餘匪溷入其中並著曉諭饑民等使其自相  
保認如有習教從賊之犯潛來粥廠伊等卽當官

密首立時拏獲究辦務使良莠不致混淆奸徒淨盡問閭自長臻安輯矣

上諭內閣曰那彥成奏甘肅花馬池營叅將陳弼跌傷左腿已成殘廢懇請休致等語陳弼在軍營剿賊奮勇出力茲因攻克滑縣從城上墜跌以致左腿殘廢甚爲可憫陳弼著加恩賞給副將銜准其休致仍予食副將全俸

上又諭內閣曰那彥成奏請補武職各缺一摺加恩  
著照所請甘肅花馬池營叅將員缺著熊敏謙陞  
補所遺靖遠營遊擊員缺著寶德陞補直隸天津  
鎮標城守營都司員缺著郭鵬起陞補所遺陝西  
會寧營守備員缺著張作友陞補俱先行賞換頂  
戴

正月十四日丙子長齡楊遇春朱勲奏言竊照萬



五股匪經總兵吳廷剛等節次痛剿只剩千餘人狂奔北竄臣等先派總兵特依順保楊芳協領成瑞帶領西安滿兵二百名漢兵四百名馳往斜峪關一帶截剿初四日未刻適該匪竄迎一問兵至卽折回桃川特依順保楊芳等遂跟蹤追剿吳廷剛等探知賊匪折回派令叅將張起鰲遊擊朱福壽分兵於沙壩地方埋伏該匪

竄近伏兵齊發與特依順保等兩面夾擊立斃  
賊匪二百名生擒活賊二百二十五名投出難  
民四十六名搶獲烏鎗十二桿刀矛一百七十  
八件帶傷弁兵六名天已昏黑卽就沙壩紮營  
於活賊內訊出僞軍師周在庭僞大先鋒周之  
順與其餘正賊均卽正法次日遍躡賊蹤已向  
太白山老林白雲峽地方奔竄該鎮等派都司

党聯陞守備劉藻帶兵六百名裹糧跟追該鎮等卽取道辛口峪進山夾擊適據探報陳四尤九股匪由金牛坪竄往金鷄河路通寧陝江口一帶臣等卽派吳廷剛祝廷彪帶兵由子午峪進發先顧完善之區向西截剿並可與党聯陞之兵共收夾擊之效又打散萬五股內零匪一百餘人在棗木欄一帶林內藏匿經吳廷剛續

調之都司吳連利春熬帶領署陽營兵三百名  
趕抵該處卽往搜剿殺賊二十餘名生擒十五  
名餘俱棄械逃散又據探報匪徒麻大旗劉二  
股匪一千數百人竄往隴州香泉地方臣楊遇  
春於初五日先行馳往該處一面飛催吉林索  
倫馬兵二百名固原兵一千名隨後趕到卽行  
截剿惟據留壩廳稟報萬五分出股匪吳抓抓

等一千餘人竄至棧道武關一帶臣等查該處  
路通黑河遶至漢江上游卽可入川該處備禦  
空虛現今兵力未齊勢難遠顧已飛咨成都將  
軍賽冲阿川北鎮總兵桂涵由寧羌沔縣前來  
截剿一面飭催後起馬步官兵一經到營卽派  
楊芳帶領趕往沔縣先杜入川之路再行向北  
截剿其寶鷄匪徒龔貴等一千餘人竄至兩當

太陽寺一帶現有副將何占鰲帶領固原西鳳  
等營兵五百名並鳳縣知縣劉國柱帶領義勇  
一千名跟蹤剿捕臣長齡所調之寧夏河州官  
兵由此路前來正可迎頭截剿又據署提督常  
祿報稱有龔貴股內投出民人七十一名訊係  
被裹良民當經寶雞一帶鄉民保釋再吳廷剛  
等窮追萬五股匪有陸續逃出匪徒四十七名

經各卡義勇細送前來<sub>臣</sub>等訊明後均卽正法  
又有尤九陳四等股內自行投出民人一百二  
十三名內有本地鄉民情願保領者卽行釋放  
其係川楚民人暫留充當夫役俟拏獲陳四股  
匪質訊明確再行遞回原籍

長齡朱勲又奏言查從前川陝軍需嘉慶五年  
經畧額勒登保將滿漢官兵分例核定條款

奏准通行其支銷事宜嘉慶八年經

欽差額勒布初彭齡在陝核明

奏定章程節經遵辦在案此次隨營進征各官兵  
悉照舊章辦理又漢中陝安兩鎮官兵隨同剿  
賊卽與征兵無異且現在漢中陝安兵丁尤爲  
出力可否仰懇

皇上天恩於離營三百里之外卽一體照例支給鹽



欽定四庫全書 卷三十一  
糧惟馬乾一項例止日給銀五分昨經豫省奏

明因時價昂貴奉

旨加倍發給此係

皇上破格恩施本不敢援以爲例惟念陝省本年亦  
屬歉收各官兵甫自豫省凱撤卽來陝西可否  
准其一體加給之處伏乞

訓示遵行其軍營糧米先飭各廳縣動碾倉貯穀石

如尙不敷派員分地按照市價隨時採買運貯  
寨砦並飭趕製軍火設站安夫分投滾運其文  
報往來仍照向例分別平原山路安設馬步正  
腰各塘俾臻迅速所有一應軍需事宜已飭委  
署藩司繼昌督糧道周光裕督率西安府知府  
方載豫總司籌辦其軍營糧餉並飭署臬司延  
榆綏道敦良總理其事至應需銀兩可否卽於

金史卷一百一十五 兵三 三  
軍需三成並封貯項下動支再南路徑叢雜  
所有各險要隘口已飭令地方官團集本地有  
家室之義勇既可保衛村莊亦可堵禦賊匪上  
卡追賊之日每名日給口食錢八十文以資果  
腹賊過之日卽行停止

同日高杞奏言竊

臣前奉

諭旨命臣帶兵赴陝幫同長齡剿辦南山匪徒當卽

迅速趨行行次西安知長齡已先期馳抵盤屋  
臣卽趕至軍營與長齡楊遇春朱勲會商籌計  
伏查南山路徑紛歧賊匪奔竄矯捷必須於官  
兵接仗之後盡力窮追不予賊匪以掠食之暇  
則該匪等自立見窮蹙現經撫臣朱勲於南山  
總路隘口安設糧臺撥兵守護仍恐兵行迅速  
糧運不繼該撫復於各臺安設長夫每兵四名

抽撥背糧夫一名一經見仗卽裹帶十日之糧  
晝夜跟蹤前進我兵惟當盡力搜捕斷不能聽  
其乞命投誠致留餘孽臣正在與長齡等會議  
間適又欽奉

恩旨令臣暫署陝甘督篆臣擬俟料理大兵全數入

山後再行馳赴蘭州省城辦事合併陳明均奏

入

上命軍機大臣傳諭長齡楊遇春朱勲曰長齡等奏連日痛剿匪徒拏獲僞軍師僞先鋒及催兵分路進剿緣由一摺覽奏俱悉南山匪徒滋事自上年臘月奏報以來計今已逾一月尙未辦淨此等烏合之衆若不及早撲滅一經蔓延各處完善之區遭其蹂躪老師糜餉其患豈可勝言從前辦理三省邪匪卽因初起時不認真趕辦以致多延歲月

糜帑至十千餘萬之多此時帑藏支絀迥非昔比  
不特曠日持久經費不支遲至夏間籌餉卽難以  
爲繼著勒限於正月底二月初務必一律辦竣不  
准遲逾賊匪經官兵屢次剿散之後現分數股奔  
竄此時辦理之法先須顧定平原勿令出山焚劫  
昨歲南山包穀歉收賊匪在山中無糧可掠其勢  
必窮尤不可令其竄入老林越箐穿巖是其長技

官兵輾轉窮搜必稽時日惟當四面堵截使賊所  
向輒窮我兵皆新勝之師勇氣百倍又有吉林黑  
龍江勁旅一可當百必能計日歲功現在各路大  
軍雲集將廣兵多足敷分撥萬五一股已經吳廷  
剛節次痛剿剩有數百人遁往太白山陳四尤九  
一股向寧陝一帶奔竄祝廷彪帶兵由子午峪向  
西截擊麻大旗劉二一股千餘人竄往隴州楊遇



春已親自馳往剿辦龔貴等一股千餘人竄至兩  
當太陽寺地方有副將何占鰲等在彼剿捕吳抓  
抓一股千餘人楊芳卽日帶兵前往截剿現又有  
旨飭催賚冲阿等由川迎擊各處賊匪皆有官兵  
緊躡著長齡迅速飭知各路領兵大員督率所帶  
官兵分投痛剿窮追如某人剿某股之賊此一股  
卽責成該員一手辦淨必須將爲首賊目或賊或

擒所餘夥匪亦悉數剿殺無遺方爲竣事不可得  
一勝仗又棄而之他或調往別處致剿敗之賊又  
裹成大夥總之各辦各賊功過則在一人何路官  
兵先將賊匪辦淨一股奏到時朕卽先將此一路  
帶兵之員優加獎賞若致賊蔓延亦先治此人之  
罪彼此無所諉卸長齡係總統大員居中調度各  
路均應顧及察看何處兵單卽將辦淨一股之勝

兵飭令前往協助此事捷速則功易成遲延則譴  
立至上年那彥成剿辦滑縣教匪三月之間全行  
歲事朕嘉其成功迅速是以特加懋賞若長齡等  
能督辦奮勉捷音速奏朕亦必渥施厚恩軍營得  
有勝仗著由六百里馳遞其辦理全竣之摺著由  
六百里加緊馳遞長齡等另摺所奏軍需糧餉各  
事宜業經降旨允准但此時帑項不敷皆伊等所

深悉須於樽節之中倍求樽節切勿任局員等濫支浮冒一經查出必當加等治罪決不寬貸

臣等謹按行師之道山林與原隰異宜南山之內林深箐密路徑紛歧賊匪一經剿敗卽分股竄逸冀圖牽綴我師俾難兼顧非若平原曠野可以聚而殲旃也南山匪徒滋事以來計已逾月尙未剿淨萬五陳四麻大旗吳

抓抓龔貴等股匪四散奔竄彼蓋習見川楚  
教匪初起之時辦理遲緩賊渠得騁其詭謀  
撓我師旅是以效其故智狡焉思逞設我兵  
分路追捕人無專責將帥生諉卸之心士卒  
萌觀望之意必致滋蔓難圖遷延歲月我

皇上宵旰籌幾

睿謨獨斷

特詔長齡居中調度責成各路帶兵將領各辦各賊  
必須一手辦淨方爲竣事經此次

訓示之後帶兵各員咸知功有專歸責無旁貸人思  
自効各奏乃勛是以匝月之後淨掃撓槍毫  
無遺孽膚功迅奏師不踰期

九重之上坐操勝算所謂運籌帷幄之中決勝千里  
之外固有較然不爽者矣

上又命軍機大臣傳諭賽沖阿曰長齡等奏萬五分  
出股匪吳抓抓等一千餘人竄至棧道武關一帶  
該處路通黑河遠至漢江上游卽可入川已飛咨  
成都將軍賽沖阿川北鎮總兵桂涵由寧羌沔縣  
前來截剿等語賽沖阿前因探聞洋縣地方有賊  
匪竄擾已帶兵取道保寧進剿此時吳抓抓股匪  
竄往武關一帶該處與川省邊境密通通川徑路

甚多賽沖阿務卽探明賊蹤迎頭截擊並飭桂涵  
羅思舉等各率弁兵分布要隘探有南竄之賊卽  
分道迎遏斷不可使賊匪一名竄入川境川省官  
兵得有勝仗賽沖阿卽自行由六百里奏報如追  
剿賊匪入陝與長齡會銜具奏

上又命軍機大臣傳諭高杞曰高杞抵軍營後與長  
齡等會籌各路剿賊機宜所言俱是惟據稱擬俟



大兵入山後再行馳赴蘭州殊可不必軍營有長齡等在彼督辦甘肅地方緊要亟須大員經理高杞經朕特令接署督篆卽與實授無異該署督著卽星馳赴任將應緝應審各犯及地方一切公事實心妥辦不可以暫時署事存五日京兆之見其劉添貴王風二犯節經降旨飭拏迄今未據獲犯覆奏長齡等自因軍務緊急未及兼顧著卽責成

該署督飭屬嚴拏務獲毋稍疎懈

上諭內閣曰長齡等奏籌辦征防官兵鹽糧分例及  
安設臺站各事宜一摺陝省岐山縣匪徒聚眾搶  
掠現調派滿漢官兵協力剿辦業已連獲勝仗計  
日即可蒞事所有漢中陝安兩鎮官兵離營三百  
里以外准其一體照例支給鹽糧其馬乾一項向  
例每日給銀五分該省昨歲歉收時價昂貴著照

上年豫省之例加倍給發應需軍糧各附近廳縣倉穀不敷動碾之處准其按照時價隨時採買並趕製軍火設站安夫源源運送至文報尤關緊要著照例分別平原山路安設馬步正腰各塘務期郵遞迅速應需銀兩准其於軍需三成並封貯項下動支該督等惟當督飭司道各員嚴飭所屬實心經理加意撙節毋得稍有冒濫

正月十五日同興奏言查東省武職缺出應  
請以軍營出力人員陞補所有兗州右營都司  
一缺查鉅野營守備殷正魁上年守護城池擒  
獲零匪多名又高唐營禹城汛千總夏攀龍此  
次剿平各處賊巢打仗九次均屬出力可否以  
殷正魁陞補兗州右營都司其所遺鉅野營守  
備員缺卽以夏攀龍陞補以示鼓勵之處恭候

訓示奏入

上諭內閣曰同興奏防剿出力人員懇請陞補一摺著照所請殷正魁准其陞補兗州右營都司所遺鉅野營守備員缺著夏攀龍陞補

正月十六日

戊辰

那彥成奏言查直省軍需共用

銀七十餘萬兩此後尚有凱撤官兵暨留防善後事宜并各州縣應行裁領之數連前約計將

及九十萬兩除蒙

賞撥漕糧作爲兵精外所有動用銀兩自應照擒捕  
內地賊匪之例本省自行備辦伏思直省地方  
官員于匪徒習教滋事毫無覺察咎無可辭應  
請在於現任大小官員養廉內分作十五年按  
照缺分大小廉俸多寡均勻攤捐歸款其失察  
各員內如有陞調別省除本缺不准停扣外仍

在該員名下照數扣解以歸正款奏入

上諭內閣曰據那彥成奏直隸軍需用款約計將及九十萬兩請照擒捕內地賊匪本省自行辦理之例於現任大小官員養廉內分作十五年均勻攤扣歸款等語此次教匪謀逆由林清倡首該逆伏匿郊畿借傳教爲名肆行勾結以致釀成叛案延及豫東二省勞師糜餉該管官毫無覺察形同木

偶玩誤因循莫此爲甚應照那彥成所奏罰賠示  
懲惟州縣等官職分較小廉俸無多林清及逆黨  
犯事地方又不皆在所轄境內無庸一律攤扣至  
那彥成錢臻調任皆在事後攤捐亦未平允此事  
著卽交那彥成督率錢臻查明自嘉慶十一年起  
至十八年止各厯任總督順天府府尹藩臬兩司  
及該管道員等按其在任年月秉公核算分別攤



賠以清款項

那彥成又奏言竊臣於本月十一日帶領吉林

黑龍江官兵六百名行抵開州查詢地方情形

均極安帖其應辦善後事宜謹酌擬數條恭呈

御覽一編查保甲查大名府屬各州縣與豫東兩省

地界毗連頑民慣習邪教清查保甲更爲緊要

現卽飭派候補道府葉紹本會同地方官逐戶

挨查設立簿籍門牌按時點驗一修葺塘汎查  
開州東明長垣及北路之清豐南樂直達大名  
郡城沿途向有塘汎派兵分駐以接聲援營房  
墩臺坍塌朽壞應卽趕緊修葺並於相離較遠  
之地酌添數處選派精壯兵丁常川駐守以資  
盤詰一三省交界處所應暫行設卡防守查開  
州東明長垣以及南樂清豐西南一帶界連河

金匱縣志卷之二十一  
南之滑縣濬縣儀封內黃封邱等處東南一帶  
界連山東之觀城朝城荷澤等縣現當軍務甫  
竣其交界處所匪徒易致藏匿應請暫行派撥  
弁兵分駐巡防俟麥秋豐稔民心大定之後卽  
行撤退一逆產絕產應查辦以歸公用查此項  
產業開州東明兩州縣界內爲數不多若分撥  
難民不能遍及轉滋爭競請先行召佃耕種將

來設立正定提標除將所收租息完納正供外  
其餘作爲該營辦公之用又臣前奏善後事宜  
內有正定改設提督大名改鎮一條倘蒙

允准卽請將馬瑜調爲正定提督徐錕調補正定鎮  
總兵可資得力得

旨大學士等併議具奏

那彥成又奏言查河南撫標及鎮協各營共兵

一萬三千八百八十餘名山東撫標及鎮協各營共兵一萬四千五百餘名直隸督提二標及鎮協各營共兵三萬八千三百八十餘名額設兵數本不爲多臣周歷三省邊界揆度地勢情形正定大名附近京師係屬

邦畿重地豫東兩省接壤處所爲畿南門戶必須重兵鎮守應請于正定大名一帶添兵六千名

以資鎮守並可分防開州東明長垣等處其豫東兩省亦請各添兵三千名於緊要處所安營分駐統計添兵一萬二千名每歲約需餉銀二十五萬九千餘兩米四萬三千餘石如蒙

俞允請

旨勅下部臣籌撥款項俾得趕緊辦理得

旨大學士軍機大臣會同該部議奏

是日賽冲阿奏言竊臣帶領省標滿漢官兵一

千名於二十九日馳抵保寧接陝撫朱勲來信

陝匪萬五一股經吳廷剛在袁家莊剿敗分爲

兩股每股各千餘人已至華陽鐵冶河等處欲

由留壩之桅桿石梁竄往黑河一帶川省官兵

迎頭截剿等因查賊匪一聞川省官兵前來截

剿勢必四散狂奔若竄入老林必須分兵追躡

臣現在就近派帶川北鎮兵五百名及現帶省標兵一千名並飛催松潘兵五百名迅速前來其續調之松潘兵五百名卽交與桂涵分撥要隘防守如尙須添兵臣已咨會常明再行就近添派並令桂涵等若探有陝匪竄近邊境卽彼此策應合力堵剿毋任闖入奏入

上命軍機大臣傳諭賽沖阿曰賽沖阿奏調派川省



兵二千名帶赴陝省會剿並續派兵五百名交桂  
涵等分撥要隘防堵等語前據長齡等奏萬五分  
出股匪吳抓抓千餘人竄往武關一帶當經降旨  
飭令賽沖阿帶兵赴寧羌一帶探聽賊蹤迎頭截  
擊現在賽沖阿已帶兵由保寧一路星馳赴陝既  
入陝境無論何股賊匪探知相距不遠卽迅速帶  
領弁兵前往撲滅務將首夥各犯掃除淨盡切勿

得一勝仗任聽餘匪竄匿又滋裹脅川陝邊境多  
係老林尤當留意防堵勿令賊匪竄入以致搜捕  
費手其南面入川一帶當處處嚴防川省完善之  
區斷不可使賊匪一名闖入賽沖阿曾任吉林將  
軍此次吉林官兵在豫省打仗得功因賽沖阿平  
日訓練有方已加恩交部議敘此時帶兵剿賊正  
該將軍報効之時若能剿除大股賊匪擒獲著名

首逆俾陝省軍務速蒞朕必加以懋賞賽冲阿不  
可不勉之又勉此時多隆武亦已到彼該省將軍  
提督同力督辦此等烏合之衆無難一鼓殲除總  
期於一月內辦理蒞事毋稍遲延若堵剿不力致  
匪徒蔓延竄入川境亦必重治其罪不稍寬貸

正月十七日

己卯

上諭內閣曰御史夏修恕奏請嚴禁妄拏無辜一摺

所奏甚是此次辦理叛案其從賊逆黨必當悉數  
捕誅不容一名漏網但豈得因此株累查拏擾及  
良善近日審訊各處查緝送部之人多有妄報邀  
功挾讐誣陷者雖審明後卽予昭雪而其人羈禁  
囹圄室家播棄貲產蕩然且有因以瘕斃者似此  
妄行羅織心實不忍良民何辜遭此苛政其何以  
消沴戾而召祥和現在必應查拏之犯俱經刑部

將年貌住址根究明確開單飭交京畿及各省按  
名躡緝務獲究辦此外如有妄拏無辜誘供刑  
逼以及仇扳捏控者審明俱按律坐誣治罪庶矜  
慎刑獄除莠安良以靖人心而迓

昊貺

是日劉鏞之費錫章奏言臣等欽奉

諭旨據逆犯牛亮臣供于克敬將三佛應刼書一本

獻與林清前此拏獲林清搜其家中並未見有此  
書此等悖逆書詞豈可任令流傳再滋煽惑著順  
天府遣派精細妥員前往該逆家中將其住屋周  
遭上下逐一搜查刨挖務將此書起獲並於附近  
朱家莊一帶留心細訪或因該逆被獲之後其家  
中遺留物件先經該處人民私取潛藏卽行明白  
曉諭令其呈出不但免罪並可量加賞賚欽此

臣

等遵卽遴派宛平縣典史吳孝愉卽時前赴林清住屋搜查創挖至十三日酉刻據該員馳稟在於林清家中周遭上下遍行搜挖並無別物末後搜至該逆所住屋簷下見有砌就牆孔一個外有浮磚遮蓋卽去磚探挖取出紅布小包內裝書一本後有三佛應劫統觀通書名目於十四日親身齎繳前來查此書共計二卷其上

卷稱得自山西平陽府岳陽縣恐該處尙有傳抄之本除飛咨山西巡撫衡齡嚴密訪查以期搜燬淨盡外謹將原書進

呈臣等於上年兩次搜查未獲今蒙

聖明指示始不至終於遺漏曷深惶悚應請

旨交部議處奏入

上諭內閣曰宛平縣典史吳孝愉將林清家內屢次



五  
三  
一  
四  
未經起出逆書細心搜獲尙屬能事著加恩以縣丞卽用劉鑑之費錫章自請議處之處著加恩寬免

上命軍機大臣傳諭衡齡日前據逆首林清供出伊家藏有悖逆邪書節經降旨飭查並無下落嗣又據逆犯牛亮臣供出于克敬曾將三佛應刦書一本送與林清等情復降旨飭查據順天府奏於該

逆家中起獲三佛應刼統觀通書抄本一冊呈覽  
其詞句狂悖殊堪痛恨此等不法經卷豈可任令  
流傳再滋煽惑其書內稱此經出在山西平陽府  
岳陽縣王家莊等語此書既由該處流傳恐抄寫  
不止此一本附近村莊尚有收藏潛匿之人著衡  
齡卽派精細妥員前往密訪如有收藏之家立即  
查起封送軍機處銷燬並嚴追來歷務搜查淨盡

金匱要略卷三十一  
勿令再有傳寫貽惑鄉愚

正月十八日庚辰

上諭內閣曰上年九月廷訊林清據供伊有邪書一本用紅布包裹藏匿家內當經飭令步軍統領順天府衙門派員搜查未經起獲本年正月十二日廷訊牛亮臣復據供稱林清實有此書係賊目于克敬轉給因又飭知順天府再行查起旋據劉鑑

之等派員於林清家牆穴內起獲封固呈覽其書  
悖謬荒誕不經已甚卽行焚燬當日林清藉此誑  
惑鄉愚邪說誣民上千

天討故其書雖深藏固秘隱匿數月終被搜獲銷燬不  
使存留于世何況顯爲悖逆之徒覆載不容豈能  
倖逃法網若承緝之人心存玩愒以爲其事旣往  
不速認真躡訪則是不能善承

吳蒼除邪興正之心不存忠君護國之志又染因循怠  
玩之習朕必立施重罰不赦著再通諭步軍統領  
順天府五城並直隸等省將前此飭發查拏從逆  
最要次要各人犯照年貌名單上緊密訪嚴拏勿  
稍疎懈此內如祝現劉呈祥劉第五董伯旺支進  
才劉成章等逆更爲巨惡尤須剋期弋獲試思此  
次順天府搜獲逆書之典史吳孝愉朕尙施恩破

格陞用若官弁兵役能緝獲渠魁必更優加獎賞  
但必審明確係正犯始錄其功若妄拏無辜拖累  
善良亦必治罪不貸

上命軍機大臣傳諭長齡楊遇春朱勲曰長齡前任  
河南巡撫逆犯李文成馮克善牛亮臣等本皆該  
省民人私與林清勾結往來借傳教爲名糾聚黨  
夥多人約期造反長齡職任封圻毫無覺察上年

將伊簡任烏魯木齊都統離任未久豫省逆賊旋即起事戕官陷邑荼毒生靈地方大遭蹂躪究其蓄謀年月正在長齡任內厥罪實與溫承惠等朕未加懲處並因那彥成督兵豫省一時乏人將伊簡放陝甘總督長齡捫衷自問當如何知感知愧伊甫抵陝甘之任南山亂民滋事之案非伊之咎但伊積愆甚重此時帶兵剿賊正當奮身自贖前

已節次降旨飭令趕緊督辦目下征兵雲集足敷調度惟國家經費不支伊所深悉若遷延日久老師糜餉所患甚大茲限於奉旨後一月內全行辦竣仍不許草率完結稍留餘孽如果剋期蕝事不但寬免從前重罪仍當懋加獎賞伊來京陛見後另有擢用之處若辦理延玩遲逾限期則二罪並罰必將伊卽行拏問從重治罪屆時朕另簡派大



員前往不患無人長齡自問當置身何地耶朱勲  
久任陝西藩司擢任巡撫南山距省甚近饑民乏  
食滋事致亂有因該撫不能先事豫防迨焚掠肆  
擾又未能立時剿辦意存招撫其所派招賊之人  
旋經被賊戕害辦理種種不妥亦與溫承惠長齡  
無異今且不加懲處姑令戴罪自贖著將應需軍  
火糧餉不准糜費妥爲經理並督辦地方防堵事

宜如果糧餉無誤防堵嚴密俾征兵得以迅速剿捕如期竣事彼時卽不再予恩施尙可貰其前罪仍留巡撫之任若怠玩貽誤亦必卽予拏問從重治罪不能寬貸至楊遇春謀勇素著忠君急公此次辦理滑城叛匪統率勁兵三月之間掃除淨盡實屬可嘉功成之日朕特加懋賞本令來京陛見回任因陝省亂民滋事又派令帶領吉林黑龍江

得勝勁兵馳往會剿該提督及所帶官弁兵丁倍  
加勞勩甚爲厯念該提督務協同長齡等奮勇安  
辦鼓勵將士一鼓蕩平歲事後除前次晉爵酬庸  
外仍再加以上賞以獎勲勞但不可似從前隨同  
德楞泰辦理蒲大芳一案草率因循姑息從事又  
貽後患此事係山內匪徒因乏食肇衅烏合倡亂  
惟當一意痛剿俾知震懾兵威久臻寧謐斷勿心

存招撫又墮賊謀著長齡楊遇春朱勲通飭各路  
將領各就所辦賊股亟剿窮追不稍予賊以暇辦  
完一股再合兵共剿一股總於一月內全數辦竣  
朕竚待捷音普施恩賞勉之望之